



CLAUSTRA GLION

Claustra da Glion seprepara pil futur

(cdm/fmr) Gl'onn 2015 ha la congregaziun dallas soras dominicanas da Glion festivau siu giubileum da 150 onns. Dapi che sur Gion Fidel Depuoz ha fundau la claustra ein 156 onns vargai e novas tendenzas diregian il cuors dil mund. Per quellas vul la claustra da Glion sepreparar. Sco quei che la claustra communichescha, ein la soras sedecididas da far ina reorganizaziun giuridic-administrativa. Dapi 130 onns era la claustra ina uniun tenor artechel 60 dil Cudisch civil svizzer e registrada legalmein sco «Institut St. Joseph». Sedia dall'uniun cun intent religius e caritativ era Glion cun filialas en Svizra ed egl'exteriur. «Pervia dallas structures che semidan pli e pli essan nus confruntadas culla damonda schebein la fuorma giuridica d'ina uniun ei aunc adattada d'ademplier el temps modern nosas incumbensas multifaras e da dumignar las sfidas che vegnan encunter a nus», scriva la claustra. En sia comunicaziun annunzia ella che la cuminonza seigi sedecidida da mantener l'uniun e da fundar supplementarmein ina fundaziun tenor artechel 80 dil Cudisch civil svizzer. Oz vivien e lavurien 117 soras cun ina media da vegliadetgna da 78 onns en Svizra, a Taiwan ed en Brasilia. Il svilup hagi intimau ellas da sviluppar per la congregaziun novas sligiazions ch'ei supportablas economicamein. Ils 10 da zercladur 2021 han las soras da Glion fundau la nova «Fundaziun dallas soras dominicanas da Glion» e transferiu en quella ina part dalla facultad dall'uniun. «Quei pass garantecha a nus d'administrar e duvra nos beins a liunga vesta el medem senn», scriva la priura generala, sora *Annemarie Müller*. Il cussegl general d'entochen ussa dalla congregaziun resta identics cul cussegl da fundaziun. Presidenta da quei gremi ei sora *Annemarie Müller* e commembras las soras *Armina Maissen*, *Miriam Ribeiro* e *Monika Hüppi*. Cul temps sappien era buca commembras ni commembers dalla congregaziun vegnir elegi el cussegl da fundaziun. *Ursula Ris*, la meinagestiu dalla claustra e ses menaschis accessorics, ei era responsabla per la direzzion operativa dalla fundaziun.

Sedia dalla nova «Fundaziun dallas soras dominicanas da Glion» ei Glion. Intent eis ei da financiar la veta monastica dallas soras e lur activitads egl'apostolat sco era da financiar lur veta inclus la tgira tochen la mort. Vinavon ei la fundaziun responsabla da mantener e sviluppar las immobiglias e possess che las soras drovan per habitar e luvrar. Quei ei oravontut la claustra. Cul sustegn ideal e finanziar dueien las soras saver ademplier a liunga vesta lur finamiras d'entochen ussa senza limitaziuns el senn dils fundaturs dalla congregaziun. Sora *Annemarie* numna oravontut la Casa Sentupada e la Procura per las missiuns. Quels dus menaschis dueien vegnir menai e sviluppai vinavon, era suenter che la cuminonza dallas soras va a fin. «Nus essan perschuididas che nus havein fatg il dretg pass cun fundar quella fundaziun. Quei garantecha che nus savein mantener ils interess dalla cuminonza e luvrar pil beinesser da biars carstgauns cheu e vi surmar», scriva la claustra vinavon.



La claustra da Glion vul sereorganisar.

FOTO AUGUSTIN BEELI